

Սիրելի ընկեր, որ պատահեցիր
Իմ և մուսայիս վեճի ժամանակ,
Զգայուն հոգով այնքան ցավեցիր,
Այնքան ջանացիր, որ մենք հաշտ մնանք,
5 Քեզ եմ նվիրում այս տրտում (?) էջը
Քեզ, որ հասկացար այն ծանր վեճը:

[Այսպիսի] ծանրը ու լուռ վեճերով
Մաշվում է մեր կյանքն.... սպառվում,
Հոգնում * * * * *
10 Հոգու սրբազան կրակը մարում,
Անպտուղ դառնում կյանքը բեղմնավոր,
Թարշամում, ինչպես ծաղիկ մենավոր:

Այսպես է մեր մեջ գրողի կյանքը...
Եվ մեր աշխարհքում խավար (?) ու մթին,
15 Ո՞վ է հասկանում այս վեհ տանջանքը
Ո՞վ է թափանցում գրողի հոգին.
[Եվ ո՞վ է առնում իր սրտին մոտիկ...
Ո՞ր է այն մարդը, ո՞ր են այն մարդիկ:]

Ես ևս առած քնար գրողի,
20 Թեև շատ անշուք, երերուն (?) ու կարճ,
Անցել եմ կյանքում մի դժվար ուղի,
Կանգնել եմ անթիվ փորձուժյան առաջ.
Վիճել եմ – անցել... և այժմ գրում,
Քեզ, որ իմացար, քեզ եմ նվիրում: